

ti igitur variique fuerunt in ea oppugnanda barbarorum conatus: nec uno prælio Christianorum pertinaciam frangere hostis est adortus, ac disiectis mœnibus, nonnunquam intra oppidum irrupit: verum propugnatorum virtute, quorum pars maxima Hierosolymitani fuerunt Equites (penes huiusmodi religionis viros in insula totius rei summa est) cum ingenti cæde hostis a mœnibus est repulsus, oppidumque & divina & humana ope servatum. Ferunt postea ex ipsis barbaris cognitum, duos viros forma aliquanto humana augustiore, quandiu tenuit obsidio, noctu incensis facibus, circa muros excubare solitos: ac ubi jam prope captum esset oppidum, minaci occursum illos pro muris visos ferrum identidem intentare: atque ita barbaros religione perculsos cessisse. Creditum vulgo, Petri Apostolorum principis ac Pauli simulacra illa fuisse. Quod si ita accidit, haud absurdum erit dicere, Rhodon non tam humano quam divino præsidio tunc servatam. Cæterum illud quoque non multo post miraculo datum, eo die quo Othomanus, acerrimus christiani nominis hostis, vita decessit, Rhodiacus portus ita marinis fluctibus repente est destitutus (quando alioquin miræ esset profunditatis) ut naves quæ in portu stabant, in ipsis vadis velut in sicco everisæ sint. Sed illud anno ferme post, cuius verno tempore majus omnino facinus ille adortus, Hidruntem subito incursum oppressit. Est id Calabriae oppidum, quod Aulonis littoribus modico maris intervallo respondet. Est Aulon antiquum navale; id breve maris spatium, quod locum ab Italia dirimit, quodque quinquaginta habet passuum millia, Pyrrhus Rex pedestri continuare transitu, pontibus jactis, primus excogitavit; post eum Marcus Varro, quum Pompeji classibus piratico bello præfesset: sed utrunque aliæ impedivere curæ. Hidrunte a barbaris oppressa, apparebat Othomanum totis imperii viribus Italiae incubiturum: imminebatque ex eo christiano nomini ingens discrimen, nisi matura illius morte manifesta Dei providentia terror ille discussus esset. Nam medio belli apparatu pestis humani generis extincta est:

*Servatur
Divino præ-
sidio.*

*Hidrus in
Italia op-
pressa.*